

KUMPUNAN
KHAWTLANG NUN
SIAMTHAT

YMA AW



CHANMARI WEST BRANCH YMA CHANCHINBU KAR TIN CHHUAK. VOL. XXIII. ISSUE NO.24 19th June 2011

YMA Day hlimawm taka hman a ni.

Branch News

Chanmari West, June 19:

YMA Day Vawi-76 na chu Ni 15.6.2011 (Nilaini) nileng khan Indoor Stadium-ah hlimawm tak leh ropui taka hman a ni. YMA Day hi chawhma dar 10:00 ah Function tan a ni a, function hi Pu R.Lalhmachhuana, Chairman YMA Day Programme Committee leh Branch YMA Vice President ni bawk chuan a kaihhruai a ni.

He hunah hian Section hrang hranga membarten infiamna items chi hrang hrang hmangin hun an hmang a, zing dar 6:00 ah hun hmang tanin Mass Road Racing a tan a ni a, vengchhung a YMA member 76 lai mai YMA Day vawi-76 na denchhen hian an tlan a ni. Tin, tlan zawng zawngte hi Ball-pen tha tak pek vek an ni.

Zing dar 10 atangin Indoor Stadium ah YMA Day lawmna hi hman chhonzawm leh nghal a ni a, Vanapa Section chuan Opening Song mawi tak maiin hun an rawn hawng a, Kumpuan Chairman leh Branch President ni bawk Pu T.Ngurkhuma chuan Kumpuan thupui 'Khawtlang Nun Siamthat' hmangin thu tha tak tak a sawi bawk a ni. Infiamna hrang hrang in Section ten inelna thianghlim tak hmangin hun an hmang bawk a, chhun lamah Ar sawhchiar tuihnai tak ei ho a ni.

Section ten infiamna hrang hrang a inelna an neih zawh hnuin a kharna inkhawm leh lawmman semnahun hman zui nghal a ni a, he hunah hian vengchhunga zima leh infiamna lama mi hlawhtling te hnenah chawimawina hlan nghal a ni. Section hrang hrang Secretary te inzaisiakna neih chuan kalkhawmte beng a ti tlai hle. He hun hi vengchhunga pawl hrang hrang MUP, Local Council hruiatute leh membarten an hmanpui bawk a ni. YMA Day a Section hrang hrang ten inelna an neih ah hetiang hi result a ni.

- 1st Khuangchera Section
- 2nd Neuva Section
- 3rd Vanapa Section
- 4th Taitesena Section
- 5th Chawngbawla Section

Lawmman pakhatna dawngtu section hian Silpaulin dawngin pahnihna in Dekchi, pathumna in Steel no an dawng a, palina leh pangana te hian Enamel no an dawng bawk a ni.

Ni 15.6.2011 khan Indoor Stadium-ah YMA Day Vawi -76 na chu hlim taka hman a ni.

Ni 14.6.2011 kha World Blood Donor Day a ni a, Vanapa Hall-ah thisen pe tha chawimawina hlan a ni. April 2010 - March 2011 chhunga thisen pe tamte hnenah chawimawina hlan a ni. Kan Branch YMA pawhin lawmman 2-na dawngin Trophy leh Ciation mawi tak kan Branch President-in a va dawng a ni.

Kumin YMA Day pual hian kan vengchhunga damlo awm mi 17 te hnenah Branch YMA chuan damlo kan nan ` 500/-theuh a hlan a. Tin, Chawnpui a Bethel Camping Centre tanpui nan ` 2000/-hlan a ni bawk.

YMA Day lawm na a senso atan New Horizon School in ` 2,000/- , Pi Biakhluni'n ` 1,000/- leh Pu JK Zosangliana'n Mass Road Racing a ti tha te hnenah Pen-drive a pe chu Br: YMA chuan an chungah lawmthu a sawi takzet a ni.

PEM LUT

Heng mite hi kan vengchhungah rawn pem lutin veng tana mi tha tak an nih kan beisei.

Pu Lalthlamuana te chhung Champhai Vengthlang atanga rawn pem, Pi Hauziki 'K' Section in luah.

Tv Vanhmingliana Lengpui atanga rawn pem, Pu RK Daniela 'K' Section in luah.

Lalliana Tochwawng te chhung Ramhlun South atanga rawn pem, Pu HVL Zasanga 'N' Section te In bul.



TUN KAR CHANGVAWN

Tupawh Pathian duhzawng ti apiang chu, chu mite ngei chu ka unaute, ka farnute, ka nute an ni asin," a ti a. Marka 3:35



Editorial Board

Editor

RK.Rozidinga
9436142304

Joint Editor :

RK. Malsawmkima
9862578441

News Editor

Tv. Thangkuma
9862303135

Pu Vanlalhluta
9862366308

Tv. Vanlalfawna
9856301975

Cir.Manager

Johny Lalthanpuia
9612359161

Jacob Lalrinsanga
9612319779

Production

Manager
R.Lalmachhuana
9436151817

Branch Office Bearer

President

T.Ngurkhuma
9436190843

Vice President

R.Lalmachhuana
9436151817

Secretary

RL.Thanhnuna
9436152760

Asst. Secretary

K.Darthanthuanga
9436196071

Treasurer

C.Lalzarliana
9436142049

Fin.Secretary

Lalthuamluaia
9612216649

Advisers

Pi Zamanthangi
Pu Vanlalsawma
Pu Rothuama
Pu Lalbiakthanga
Khangte

Nang erawh chu engkimah fimkhur la, hrehawm tuar la, Chanchin Tha hriltu lam hna thawk la, i rawngbawlina kha hlen rawh. II Tim 4:5

Editorial : World Blood Donor Day hman zawh takah kan Branch YMA chuan lawmman 2-na dawngin Trophy leh Citation mawi tak a la a, thisen pek hi nasa takin kan intihhmuh tan ta hle niin a lang. Hetihlai hian Damdawiin hmun hrang hrangah thisen indaihlohna a nasa hle thin a, damlo thisen pek ngai hi nitin leh darkar tin deuh thaw in an awm reng a ni. Thisen pek hi hlauhawma ngai tamtak kan la awm emawni chu aw a tih theih a. Kan hriat theuh angin thisen pek hi mi hrisel tan chuan a hlauhawm lohina nunna hlu tak kan chhan thei zawk a ni tih kan hriat thar a pawimawh hle. Midangte tana malsawmna ni tur leh tanpui ngaite tanpuitu ni tur chuan kan thisen hlu tak ui lova kan pek hi kan tihmakmawh a ni dawn lawm ni. Thisen pe la nun chhanhim rawh tih a nih kha maw...

Article :

TLAWMNGAIHNA Vrs INLAWMNUN

- *Samuela Pa*

Ngaihtuahna seng tlem ber leh dawntawi ber hian mahni ngaituh zawng zawng han chhimthal bekang puahpui ve leh phawng mai teh ang.

Kan pi leh puten Mizo nuna sawi nuam an tih em em, zosap ten chanchintha min rawn hrilh a, Kristianna Eng hnuai kan chen hnu, tun thleng pawha kan uapui leh sawi nuam kan tih em em. Miao chanahin sawi tawha kan lamrik ban theihloh, zonun zemawi (TLAWMNGAIHNA) hi, kei lungmawl hian he nun hi INLAWMNUN ani mai lo maw ka ti thin.

Enge TLAWMNGAIHNA chu? ti hian lo sawi ve dawn ta ila. Midangte harsatna leh manganna taw lo tura siam, a taw mekte leh tanpui ngaite lakah phutlet leh hlauh beisie reng reng lova tanpui te. Mi rilru hah leh mangang ngawih ngawih thlamuan leh hnem te. Mahni mihring puite inkara harsatna tawkte tana remna siam leh thlamuang taka siam tawnte. A famkim lo hle ang tih chu ka ring.

Engpawhnise tlawmngaihna han thlirzauna atan a chungang point tlemte chauh pawh khi lo keu ve ila. Ka thil tawn hriat pahnih lek kan ti ri ve ange. Mizote hi mi tlawmngaiber kan ni em tih thlir nan mai a ni e. Kum a kal ve fe ta mai, tuna kan editor hi chu maian ah pawh ala zam awm love. Nute lo sul hmuak tura ka kal chu ruahpui vanawn in min nuai ta chiam mai a, tah mai loh chu tihtur dang a awm tawh lo. Chumi tuma duat taka a phurrit tak nena min pawma, changel hnan min khumpui a min thlamuante, kan in thleng a him taka min thlent chu-Tuikuk putar zuk ni tlat a.

Kum 1985 anita Silchar Airport-ah ka pu Vellore-a hrui tura ka awm chu kan chuanna tur thlawhna ah passenger te an lut zut zut tawh tihin ka chhungte chu Aizawl an rawn chhuahsan thei si lo. Ka mangang chu ticket refund ka tum a an phal der lo lehngal, theihtawp chhuaha kan beih ngial a ka tuipuiral tawng thiam zawng zawng leh a bak ka hman zawh tawh pawhin sipaibo ka bang ta map mai. Mahse ngai teh, thil mak tak mai alo thleng, a hna zawng zawng kalsana min puitu ka tawng tlat mai. Ani puihna a zarah ka Vellore ticket pali chu pakhatmah hloh lovin ka hmukir anih chu, amah lah chuan cheng khat pawh ala duh der lo, ami puihna ah khan buai tak ani-Officer ho lah hmaisen a hmuhin an inhau nasa ava mak/tlawmngai em! (Samuela nu hmasa ah ka puang e) Kan ngaihsan vak loh Bengali nula lenghal. Aizawl khawpuiah ngei pawh hnamdang pawisawilo lakah hian Tlawmngaihna/Hawihawmna lantir lehzual hi ava duhawm em.

Hetianga hnamdang tanpuina dawng mi tam tak in awm tih ka hria, sawitur tam tak a awm ang; lo dahtha ta ila. Chuti anih chuan engemaw Zonunmawi Tlawmngaihna chu ni ta ang le, tih chu kan inzawhna lo nita se. Hnamdang te pawh ina an neih ve tho, hah tak leh thahnemngai taka an lo chhawmnun ve tho chu keini zofate hian kan ta bik, kan nun leh kan society nena inzawm tlat kan ti thei bik ang em?

Pathianin mihringte min duandan reng rengah hian kan nunah hian tlawmngaihna hi a bet tlat niin a lang. Mathaia 7:12 chauh pawh hi lo en ta ila-Dan thu leh zawlneite thuah chuan 'Chutichuan, thil engkim miin in chungang an tih a in duh tur apiang chu, mi chungang pawh ti ve rawh u' tih kan hmu a ni. Hetianga Pathian thupek kan hmu anih chuan, mi tu pawh, Christian ani emaw nilo emaw kan mawhpurhna chu midang chungang thatchhuah/Tlawmngaihna a ni mai dawn lawm ni.

Chutih rual chuan Mizo Kristiante kan vanneihna leh Vohbik kan nihna alo lang ta. Pakhatna ah chuan a ram puma he thupek hretu, Bible ringtu kan nih hi. A pahnihna ah chuan midang chungang that chhuh theihna tura inpawlkhawm Society-a min din bik hi ava ropui em! Chanchintha tih en kan nih hma daih atang tawha midangte tana thatchhuah thin, luchhum banchhum huam hnam kan lo ni a. Eizawna harsa zawk leh thawkmawh zawkte kaichhuak a, inlawm dial dial thin hnam kan nih kha a ropuiin kan vanneihna tak a ni.

Awle, chutianga INLAWM dial dial thin hnam kan nih chuan kan tunlai nunah lo kailut dawn ta ila. Nang leh kei hian kan LAWM tha sen leh rull hi engang chiah nge ani tih ilo ngaihtuah mai mai ngai em? A hnuai point tlemte atang khuan mahni ah zirtur lo insiam teh ang.

Tun hnaih kum hnih chhung khan chhiat tawh vangin hmun hrang hrang pali velah ka kal ve a. Chuta ka thil hmuh leh hriat chuan min hneh thai hle mai. Harsatna zualbik leh rokhawlna lian tak nei bik an nih loh chuan puitling zawng zawng inah mithhi vuin an awm a. Mitthi hnaivai a kawngouian lam kawngkapui leh tukverh reng reng hawng ka hmu ngai lo, dawrkai dawr hawng phei chu an awm ka hre lo, keini veng hi enge kan an ve le, engtinge lawm tha min rull ang?

Vengchhungah chhiattaw an awmin chhungkaw member zawng zawng chu kal theih a ni love. Chutihrual chuan chhiattaw ina a tu amah kal ngailo/lawm ngailo engzat tak kan vengah hian awm ang maw? Chhiat kan tawh ni ah lawm tha min rull ve hunah kan lung a awilo palh ang e, tan i la ang u!

YMA thiltikhawm, social/hnatlang etc. apianga hman lohna nei fo ho hi angai kan i duh khawp mai. Tumahin hunawl kan nei tak tak lo, kan inpek luih hian kan hman a ni mai.

(Phek 4-na ah chbunzawm a ni)

VANAPA

✎ Ni 14.6.2011 khan Section chung Faina hnatlang neih ani a, Member 60 chuang an hnatlang, hnatlang tanpui nan Pu R.Lalmachhuana (I-hmaa) leh Pi Lianzothi ten tanpuina an pe, naktuk zing hian rokhawlhna a awmlh chuan bawlhhlawh la awm te paih hnatlang koh tum ani.

✎ YMA Day Function ah Zaipawl tha tak mai neih ani a, theihtawp chhuah a member Item nei tu te zawng zawng chungah Section in lawmthu a sawi.

✎ Zaipawl hla zir nana an in phal taka an hman tir thin bakah Thingpui tui taka an lum sak thin avangin Pu H.Lalrinthanga te chhungkaw chungah Section in lawmthu a sawi.

✎ Zirtawp zingkar khan Zawlbuk sak mekah Section hnatlang neih ani a, Member 20 chuang an thawk chhuak.

✎ Pi Rodawli'n zai tenau a tawh hnu ah in lamah a inenkawl mek.

✎ Ni Janet Lalnunpuii d/o R.Zoramthanga leh Pi Irene-i d/o K.Lalramliana ten hna tha tak an hmu a, an lawmpui hle.

CHAWNGBAWLA

✎ YMA DAY lawmna ah member thahnem tak an kal thei chu an lawm hle a, intihsiakna a tel tura ruat ten an chanvo an hlen chhuah theih avangin Committee chuan an chungah lawmthu an sawi.

✎ Pu C.Lalramdina'n Section in an hman atan Rs 1500/- a pe a, a chungah lawmthu an sawi.

✎ Pu Lalruatsanga te chhungin hun rei tak ata tawh Section Gas an laksak thin a, Pu R.Thansanga te chhungin Kuang siam Thingpui an pe thin bawka an chungah an lawm takzet ani.

✎ Pu Zonunsanga ten karhmasa Inrinni khan phir mipa an nei a an lawmpui hle.

✎ Section thalai inkoh khawm chu Vengchung chhiat tawh avangin thulh leh ani a, a hun tur hi a thara ruat leh ani ang.

NEUVA

✎ YMA Day Section intihsiakah membete thawhrimna avanga Pahnihna an ni leh Dekchi tha tak mai an dawng chu an lawm hle.

✎ An Section-in hengah te hian Gold an la :

1) Jenny Malsawmtluangi - Mass Road Racing

(N-Section Report chhunzawmna)

2) Zomuanpuia - Ball Kick

3) Tug of War (M)

4) Attendance

✎ YMA Day-a Section aiawha tel tura ruat tihlawhtlingtu zawng zawngte chungah lawmthu an sawi a, chutih rualin engmah sawi lo kal bawksi lo an awm chu pawian ti hle.

✎ House No.leh Name Plate man Bial neituten khawnsa awm angang te Secretary hnenah vawiin tlaiah thehluh tur a ni.

✎ Pi. Vanhmunmawii w/o H.Lalthanzuala a mita lungte awm Aizawl Civil Hospital-ah zai a ni a, damtaka a lo chhuah leh thuai an duh.

KHUANGCHERA

✎ Pu R. Vanlalnela K-70 chu ni 7.15.2011 khan a boral a. A chhungte Pathianin awmpui a thlamuan turin duhsakna an hlan.

✎ 2011 YMA Day lawmnaah Gold-6, Silver- 7 leh Bronze-4 la a an champion chu membete thawhrimna leh inpekna a nih avangin lawmthu an sawi a. Item tina tha leh theihna sengtu zawng zawng chungah lawmthu an sawi.

✎ Ni 13.6.2011 zing khan Section faina hnatlang member 70 bawr vel hnatlang ten hmun hrang hrang an thianfai a. Hnatlang ei leh in tum saktu section leader chungah an lawm hle.

✎ YMA Day denchenin YMA hruaitu thin Pu C. Lawihmingthanga hriatreng nan a nupui Pi Laldinpuii chuan section te hman turin Dekchilian a rawn pe a, a chungah lawmthu an sawi.

✎ An Leader damlo pawh that lam a pan zela, dam tha leh thuai turin an duhsak

✎ Tunlai hian section huam chhungah ruihtheih thil a tlangnelin veng dang atanga lokal a bengchheng siam ching an awm tih hriat a ni a, In neitute fimkhur turin an chah a hruaitute chet hun nghak lova insiam tha turin an chah.

✎ Fur ruatui alo tam leh ta a, chhung tinte mahni in leh a vel enkawl

✎ Section Mistiri bungrua, Ara, Tubauh thenkhat a awmna chin hriat loh dahtha emaw chuan YMARUN-a Mistiri Box-ah dah leh thuai turin an ngen.

✎ YMA bungrua hi khawtlang ta a nih ang ngei a mintinin dimdawi taka enkawl turin an ngen.

TAITESENA

✎ YMA Day vawi-76-na hman zawh taka Section member tel zawng zawngte leh Items hrang hranga chanvo ti hlawhtling tute chungah lawmthu an sawi.

✎ Ni 13.6.2011 zingkar khan YMA Day denchenin Section chhungah Faina Hnatlang neih a ni a, member hnatlang zawng zawngte chungah lawmthu an sawi takzet.

✎ Section huamchhunga chhungkaw thenkhat mahni inbul kawr a bawlhhlawh paih ching kan la awm chu an ngaimawh hle a, bawlhhlawh paihna tur motor ah chauh paih thin turin an in ngen.

✎ Ni 14.6.2011 nileng khan an hruaitu Pu H.Lalramhluna fanu pasal neihna ah hruaituten hnatlanga eirawngbawlsak a ni.

LOCAL COUNCIL NEWS

✎ Kawrpui ah bawlhhlawh paih thin kan la awm chu an ngaimawh hle a, bawlhhlawh paih motor a paih hram hram turin veng mipuite an ngen

✎ Neuva Section huamchhunga Gas Card (V.C Card) la la lo zawng zawng ten aranglama Pu H. Laltanpuia hnenah lam tur a ni.

CWSC NEWS

✎ Sporting Club Member lak mek a ni a, vengchhunga sport lama tui mite member ni theuh turin an in ngen.

Football Sub-Committee :

✎ Ni 14.6.2011 khan O.B. meeting vawikhatna neih a ni a, thu pawimawh tak tak rel a ni.

✎ Players Registration ti tawhte dinhmun en ho niin hmalak zel dan tur te sawiho a ni.

✎ Manager leh Coach te felfai zawkna turin chanvo feltak siam a ni.

✎ An Secretary Pu Lalhmingliana (Puia) apa damlohna avanga Mumbai lama thang mek pawh dam taka an lo haw thuai an beisei.

Volleyball Sub-Committee :

✎ Committee rokhawlhna avanga sawn chu chawlhni chawnhu inkhawm banah neih zawk tur a ni a, membete kal vek turin an in hriattir.

✎ ADVA hnuaiiah Affiliation tih fel tawh a ni a, players registered zawng zawng Season Opening Tournament atan practice ngawrh leh zual a ngaih avangin naktuk thawhtan tlai dar 4 atanga kim taka practice tur a ni e.

CYMA NEWS

YMA Day 2011 denchhenin heng ah te hian tanpuina ` 10,000/- theuh hlan an ni. 1. Guwahati Mizo Welfare 2. Kolkata Mizo Welfare 3. Mumbai Mizo Welfare 4. Delhi Mizo Welfare 5. Chennai Mizo Welfare 6. Silchar Branch YMA

YMA Free Computer Centre 5th Batch tur chu ni 17.6.2011 khan Central YMA Office-ah interview neih a ni a, Diltu mi 143 an awm. Ni 21.6.2011 ah 4th Batch te Certificate hlanna CYMA Hall ah neih a ni ang a, ni 27.6.2011 atangin Class tan a ni ang.

Ni 27th June - 10th July, 2011 chhunga Krista Hnungzuitu Tawngtai Bethel Camping Centre-ah Ruihhlo ngaite puala Camping neih tur chu inbuatsaihna kal kalpui mek zel a ni a, Camping ah hian Pu Lalsanglura Ralte, Speaker Sons of God chu Speaker a ni ang.

LUSUN KHAWHAR

Pu R. Vanlalnela (70) chu Ni 15.6.2011 Dar 5:30p.m. khan Zunthlum natna avangin a boral a, a kalsan tak a chhungte CWBYMA chuan a tuarpui takzet a ni.

YMA DAY Section Intihsiakna Result**MASS ROAD RACING :**

Men

- 1-na Lalremruata K-Sect.
- 2-na LalmawizualaK-Sect.
- 3-na Hmingthanmawia N-Sect.

Women

- 1-na Jenny Malsawmtluangi N-Sect.
- 2-na Lalramnghaki V-Sect.
- 3-na Lalruatfeli T-Sect.

KAWIKAH (W):

- 1-na V-Section
- 2-na K& N-Section
- 3-na C-Section

BALL KICK (M):

- 1-na Zomuanpuia N-Section
- 2-na Lalhriatzela (Sena)CH-Section
- 3-na Rosangpuia CH-Section

MUSICAL CHAIR (W):

- 1-na Irene Fanai V-Section
- 2-na Lalawmawii K-Section
- 3-na Lalmangaihi CH-Section

TUG OF WAR (M):

- 1-na N-Section
- 2-na K-Section
- 3-na V-Section

TUG OF WAR (W):

- 1-na K-Section
- 2-na N-Section

3-na V-Section

CHINESE CHECKER (W):

- 1-na Zoramthari K-Section
- 2-na Lalthlamuanpuui T-Section
- 3-na Irene Lalmingmawii K-Section

RING THEH :

- 1-na K-Section
- 2-na N-Section
- 3-na V, CH & T-Section

DART THROW :

- 1-na Samson Zothanpuia K-Section
- 2-na Malsawmzela K-Section & Saitluanga Sailo V-Section
- 3-na VL.Thakima V-Section
K.Lalremruata CH-Section
Vanlalhluta N-Section

DRAUGHT BOARD :

- 1-na C.Lalrintluanga V-Section
- 2-na L.Ringzuala T-Section
- 3-na K.Rosiana K-Section

CARROM BOARD :

- 1-na Vanlalsanga & Joseph
Lalduhsaka T-Section
- 2-na Nundanga & K.Lalengmawia
K-Section
- 3-na Lalfakzuala & Lalhruaitluanga
K-Section

SECRETARY SOLO :

- 1-na HV.Lalthavela, K-Section
- 2-na RK.Rozidinga, T-Section
- 3-na Zairemmawia, N-Section
H.Lalrinmawia CH-Section leh
Hmingthansanga V-Section te an zai
loh avangin ` 500/-an section in a
chawi dawn a ni.

ATTENDANCE :

- 1-na N-Section
- 2-na K-Section
- 3-na CH-Section

OVERALL

1st - K Sect., 2nd-N-Sect., 3rd-V-
Sect., 4th-T-Sect. & 5th-CH-Sect.

ADMISSION OPEN

FRED-BEE HOSTEL & TUITION CENTRE
Zotlang, Aizawl.
* Mattress provided
* Separate Locker
NIGHT HOSTEL ALSO AVAILABLE

Contact :
9436152297/9862325133

HETAH HIAN SMS LA

>>9774170328<<

Kawrpui a bawlhhlawh tharlam tak tak awm leh thin hi chu a paih tu hrait a va chakawm thin ve.

961538_26

Mitthi an awm a Section neituten thlanlaih an tum lo tlat mai leh khawhar in lenpui hun inkhairual lo lutuk hi chu a veiawm thin khawp mai. Tlawmngaihna hi inlawm nun a nih teh meuh lai hian tlema awm thei deuh leh awm thei vak lo inkar hi chu a la zau deuh a ni.

977621_22

(SMS kan dawn te hi Ed. Bd ngaihdan a ni vek kher lo)

(Article chhunzawmna)

Tanpui ngaia kan lo awm palh hunah miin kan lawm tha min rulh hunah an hmanloh vek mai chuan a hrehawm duh dawn em mai, tan i la thar teh ang u.

Khawtlang leh sawrkar tana hnawksak, nuam kan tih ang zawng zawnga che thin te hiah kan nun i enther teh ang u. Kan duh thala kan nun, Lawm tha hi khawtlawng leh roreltuten an rul let palh ange. 'Miin i chung an tih a i duh tur ang bawkin mi chungah pawh ti ve rawh' Mi chungah kan tih ang hi kan chungah an lo ti ve hlauh dah ange.

Lumen ngai awm zan a meng thei to te, hmaibawl thin te, zai ngailo te kan lawm tha min rulh ve hunah tlaivar tur kan nei lovang a, zai tur kan nei hek lovang. Khawhar takin mahni chhungin kan hmangaihte ruang kan kil mai ang tih te pawh thi hlauhawm ava ni em.

Nu leh pa, mitthi vui dawn darkar chauha kal thin te u, lawm tha rulh in ngaih hunah in lawm ten darkar khat chauh an rawn tutpui ang che u tih a hlauhawm ania. Lungngai te leh thihna tuarte tana malsawmna in ni tih in hriat fo tawh kha han chhawmngung zel teh u.

Awle, he khawvela kan damchhung reilote ah hian thil tha zawng zawng hi tih tum mah ila, kan ti vek thei lovanga, kan ti ngai bawh hek lovang. Theih ang tawka kan tih hi a hluin a ropui a, Pathianin mal a sawm thin. Midangte tana inpekna ropui TLAWMNGAIHNA in midangte LAWMLa, i lawm tha chu a takin rul thei lo che mahsela, fakna leh chawimawinaa rulh i ni ang.

CHAM CHAM STORE
Chanmari West. Aizawl. C-85/01A
Ph. 9436352887 / 0389-2348162

Hengte hi kan ti thei e.

Xerox, Lamination, Photo Block Lamination,
Passport Size, Spiral Binding, Invitation Card,
Visiting Card, Signboard, Baner designing etc.

Photo quality tha tak water proof
Camera, Mobile Phone etc. atangin kan print thei.

